



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 3

Indian Open: Lakshya Sen-i Shetty kokogo

J&K LG Manoj Sinha-i sorkar tenzüker 5 mapa nungi anentsü



VOL. XXIII ISSUE NO. 91 (ADOK 91) DIMAPUR RASEMNÜ (WEDNESDAY) AENJETI (JANUARY) 14, 2026

₹ 5.00

Chungtia yimdak AKM 70 buba inti mungdang meraketa tenzükogo

Chungtia, Aenjeti/January 13 (TYO): January 13, 2026 aonung Lok Sabha MP, S. Supongmeren Jamir-i Ao Kaketshir Mungdang (AKM) 70 buba inti mungdang yangi Chungtia yimdak kanga meraketa lapoktsüogo.

AKM kübok unit balala nungi tejaoker 1,700 shi adenshia shilem agia iba mungdang nung dendaki. Taküm iba senden "Alizüngtem Züngkümshiba" omen dak rangloker akar.

Iba mungdang lapokja jembidang S. Supongmeren-i, "Iba mungdangi arurtem ya pei yim, pei town unit aser tzükong balala nungi nungi teshimtet nübotem dang lir, anungji mungdang tulu ayongzükaka nai langka danga mangazükra amajok asütsü," ta ashi.

Paisa, "Taküm nung tajangshiba balala lir, saka taküm nung temetongshitsüba melira tangazükba malir, anungji temetongshitsüba ya kanga nüngdaker aser iba ya kanga tongtibang," ta ashi.

"Asüküm tokjang aser ajemaluang, kechiyong kodang asüküm lidir ibaji ajanga pei lenmang aiadoktsü, aser pei nükjidadong mataloktsü," ta pai ashi.

"Tsüngrem akhümtsüba maparen ajak Tsüngrem dak dang



Chungtia, Aenjeti/January 13, 2026: January 13, 2026 aonung Lok Sabha MP, S. Supongmeren Jamir-i Ao Kaketshir Mungdang (AKM) 70 buba inti mungdang yangi Chungtia yimdak lapoktsüdang tangokba noksa nung angur.

rangloker inyakra taküm nung takoker kaka asütsü," ta pai ashi.

"Akhi putu nungbo tulturtemi mapa agütsüteta aru, saka tanü putu yabo tajungertem dang shimba 'merit putu' ka lir, ibayongji 'back door' ajanga mapa mangur. Anungji kanga meranga toktepa azüngtsüla, mesüra pei tebok sünga alitsü atema tanga lenmang kar bushitsüla," ta paisa ayongzük.

"Pei taküm nung nükjidadong ayutsüla saka pei sempet meteta nükjidadongji ayutsüla," ta paisa shisem.

Kasa sentong nung Chungtia Kaketshir Telongjemi mungdang lapokja saya tajung ka ia sayu. Chungtia Village Council

Chairman, Assamwati Longchar-i tesentepertem ajak pelaa agizük. Ao Senden Tir, Marsanen Imsong; Mokokchung Deputy Commission, Ajit Kumar Verma IAS; ENSF Tir, Nuheymong Yimkhiung, Ao Officers Telungjem Tir & Special Secretary Home, Limasunep Jamir IPS parnoki tajungshi o

den salem o aser tayongzükba o tulu bener arua mungdangsanger ayongzükka liasü.

Tanünü January 14 anepdang sentong 10:00 ako nungi tenzüksü aser iba sentong nung Nagaland CM Dr. Neiphiu Rio tongti tesemdanger asütsü jaoka lir. Sentong nung Nagaland RD & SIRD Minister, Metsübo

Jamir; NSF Tir, Mteisuding Heraang; CNSA Tir, Zuchobemo Jungio aser AKM Tir, Lanutoshi Aier nungeri shilem agitsü.

Nikongdang 1:00 ako nungi Ao Oshi Ojang Lutet Tetoktepbka ka agitsü aser iba sentong nung MLA & Advisor, Temjenmenba-i tayongzükba o jembitsü. Aonung sentong 6:00 ako nungi tenzüka akatsü aser yangji Wt. M Imkongla Jamir IAS, Resident Commissioner, Govt. of Karnataka, New Delhi aser Watsü Mungdang Tir, Tianaro nadia shilem agitsü.

"Tarutsü Lanuasensor: Melenshiba lima ka nung shisaluin, yimden yimsüsüba, tongtepratepren, tamangbaren aser shishilemba tsütsü lensayua aniba" nung shisa lemsa ka alitsü aser iba nung lenla balala nungi tongtibang nisung parnok pezüi shilem agitsü sentong nung amshia lir. Iba mungdang January 15 nü MLA & Advisor, TN Manen-i shibangtsütsü.

Phek jila nung alirtem tenüng asanger: CNCCI

Dimapur, January 13, 2026 (TYO): 2026 küm tasen nung ayaoka aidang Phek Town Public Forum (PTPF) kübok public-i Naga Political Groups (NPGs) shinga nem-a tax magütsütsü telemtetba agiba ta osang tajung ka aser tasütait mapa ka lir ta Confederation of Nagaland Chamber of Commerce & Industry (CNCCI)-i metetdaksüogo.

CNCCI-i iba bangzüng aser lemtet atema tenüngsang agütsür kechiyong iba ajanga

shishilembartem khuret pongbaba dang masü saka takar nungi sensaker tashi consumers kümzüka ayutsü. Iba lemtet ya Naga nunger shiai pusema nungittsüla aser tanga jila o district temia tayongzükba ka ama agizükka anidaksüla ta Media Affairs sangdong ka nung ashi.

Naga Political Groups atema- a iba ya saksalemba mapang ka asütsüla. Naga nungeri kodanga Naga nunger taginüba ka atema noktaker ta sür telungpur telok onsara razüka aotsü temeten

agüja mali ta CNCCI-isa ashi.

NPGs ajanga iba public bangzüng ya tajungleni angatetsüla kechiyong ibala bangzüng aser mapa ajanga NPGs külemi sabang ka nung longjemtsü lenmang lapoktsür, aser Naga National Movement tashi itdaksür. Nenok dang longjemra public-i "One Government, One Tax" kübok iba movement külemi yaritepa bener aotsü mulunga lir ta Media Affairs, CNCCI-isa metetdaksüogo.

Tuensang nung Poanglüm Mini Hornbill amunger

Dimapur, January 13, 2026 (TYO): January 13, 2026 nungi Chang Khulei Setshang (CKS)-i Parade Ground, Tuensang nung Poanglüm Mini Hornbill festival ayongzükka amunger.

Iba sentong nung Deputy Chief Minister Y. Patton-i tetushi süa jaoker ka ama aden.

Y. Patton-i Chang nunger den Poanglüm salem lemsatop aser iba benjungmung tulu nung pa adentsü jaokba atema pelaba metetdaksü.

"Tuensang ya mini Nagaland ka ama züngshir kechiyong idaki Nagaland nung kin aika külemi alir. Tuensang district nung aliba kintem rongnung Chang nungeri yimjung aser putepa alitsü shilem tulu agir" ta pai ashi.

Tuensang ya putiotsü nung tongtipang district ka lir anungji Chang nungeri sobaliba aser inyaksangshi mamadoki ibala benjung ya amungtsüla ta Y Patton-i ashi.

Iba sentong nung Chief Host & Housing and Mechanical Engineering Minister P. Bashangmongba-i tesentepertem

pelaa agizük, Yimkong Simba ajanga benjung tenzüka ayimoktsü, CKS Executive Chairman W. Chingmak-i onük jembia aser ES CBLT Rev. Achu Chang-i temoatsü meshia sarasadem.

Deputy CM Patton den Forest, Environment and Climate Change, Village Guard Minister C.L. John; Animal Husbandry and Veterinary Services Advisor Kazheto Kinimi; Fisheries and Aquatic Resources Advisor A. Pangjung Jamir; MLA Neiba Konyak; MLA Lima Onen aser MLA Imtichuba Chang nungeri shilem agi.

"Poanglüm ajanga asenoki belema inyakba, tajangzük anguba atema pelaba aser yimtsüngtem o kidanger aliba kintem den telongjem alitsü nenshir" ta tanü Deputy CM Y. Patton-i social media nung ashi.

"Iba benjung ajanga asenoki pelatsü, lokti tesentaktep akangshitsü aser kibong ajak nung yimjung, azükaru aser anema aliba bentsür arutsü imlar" ta paisa ashi.

District 5 nung Pawan Hans Helicopter tendangogo



January 13, 2026 nü Kohima Civil Helipad nung Commissioner & Secretary Robert Longchari den Transport Department ketdangsürtemi Pawan Hans team den külemi agiba noksa angur.

Dimapur, January 13, 2026 (TYO): January 13, 2026 nü Pawan Hans Dauphin twin-engine helicopter indang trial landing takok ngua agiogo.

Kohima, Zunheboto, Tuensang, Mokokchung, aser

Phek nung aliba helipads nung iba trial landing agia liasü.

Iba sentong takok anguba ajanga Ministry of Civil Aviation, Government of India nung RCS-UDAN scheme mezüngbuba telemsa kübok helicopter services tenzüka maparen

tejakleni aoer.

Iba telemsa kübok district pungui Dimapur den sendakteptsü aser iba ya regional air connectivity tajungba akümtsü aser Nagaland nung tesem ajungalen senzütettsü nükjidadong nung inyaker.

SyncApp indang training agütsü



Department of Planning & Transformation, Kohima indang Conference Hall nung Mongilbarnü Hands On Training for State SyncApp agidang tangokba noksa ka nung Temsünaro Aier, IAS den Department ketdangsürtem angur.

Dimapur, Aenjeti/January 13 (TYO): Department of Planning & Transformation, Kohima indang Conference Hall nung January 13, 2026 nü Hands On Training for State

SyncApp ayongzüka liasü.

Iba training nung shisalen sayur ya Er. Rishav Sethi, CEO, NITI Technologies aser Planning Officer, Kekhrie Mezhrü Sekhose liasü.

Iba training nung proposals tasen agütsüba aser Development Activities 2026-27 atema sectoral ourlays kübok tang teinyakdak projects tejangja agütsütsü atema sayua liasü.

Chümoukedima nung Republic Day 2026 atema renemshir

Dimapur, Aenjeti/January 13 (TYO): January 26, 2026 nü 76 buba Republic Day amungtsü aliba dak sendakba nung shisadokden senden ka January 13, 2026 nü Deputy Commissioner, Chümoukedima indang Conference Room nung mena liasü.

Iba senden ya Deputy Commissioner, Chümoukedima, Polan John, NCS lenisüba kübok amen aser

pai iba anogomung tajungtiba nung mungtettsü asoshi ajaki shilem agütsü aser department balala tsüngta amalitep akatsü nungdakba ashi.

Republic Day dak sendakba inyakyim balala nung shilem ka ama district ajungalen department social work ka January 22, 2026 nü alitsü, ta pai ashi.

Mürekmejutsü, yimya tajung angateta nüburtem nem shilem

agidaktsütsü nükjidong nung iba lokti nübutsök ya ayongzütsü, ta pai ashi.

Deputy Commissioner-i department balala nem mapa lezmüktsü aser pei mapa tajungtiba nung kati ka den teka amteper inyaksü ayongzüka liasü.

Iba den January 22-25, 2026 anogotem contingents ajunga atema parade practice alitsü.

DC Mon ajanga District Commendation Award atema metetdaksür

Dimapur, Aenjeti/January 13 (TYO): District Commendation Award for Gazette Officers/ Non Gazette atema temsüa alir tenüngtem District Level Committee-i asadanga January 26, 2026 nü sempet agütsütsü atema Departments tekolak tem dang tenüng meshir, ta Deputy Commissioner, Mon, Wennyei Konyak, NCS-i sangdong ka nung metetdaksü.

Tenüngtem yokba mapang

küm asem atema ACR/APAR agütsütsüla, mapa inyaker küm ter dak tema asütsüla.

HOD ajanga recommendation den employee (Annexure 'A') ajanga alakteta shilem agiba indang tongmelang agi zülur agütsütsüla.

HOD ajanga category/ grade shia nungi employee ka-ka tenüng agütsütsü akok, ta ashi.

Citation/Recommendations

ya tejangja asütsüla aser tenüng agüja aliri inyakba aser takok anguba tejangja alitsüla. Integrity Certificate nung tenüng agütsüba ketdangsüri meyongnem agütsütsü.

Recommendation lira, format (Annexure "A") nung kanga junga zülutsür Deputy Commissioner, Mon nem January 22, 2026 tashinung agütsütsüla, ta sangdong ajangasa ashi.

Shamator nung Nagaland Police recruitment takok ngua agiogo



Dimapur, Aenjeti/January 13 (TYO): Shamator nung Nagaland Police recruitment tenzüker asemnü aser tatembangba anogo nung candidates 165 nungi 57 shimteta liasü.

Anogo asem recruitment rally alidang lanur 577-i shilem agi aser written exam atema nisung 187 shim.

Iba maparen tajungtiba nung inyaktetba atema DIGP IR, South, Lakha

Koza, IPS ajanga Yimkhiung Tribal Council, Shinde Suresh. K. IPS, Superintendent of Police, Shamator-i anir DEF Shamator nung züngsemtem dang pelaba lemsatepa liasü.

YouthNet Incubation Centre-i startups pezü nem sen 20 lakh agütsü

Dimapur, Aenjeti/January 13 (TYO): YouthNet Incubation Centre (YIC) ajanga Gen-Next Support for Innovative Startups (GENESIS 2.0) scheme kübok teimla aliba 'early-stage startups' pezü nem sen 20 lakh agütsüogo. GENESIS 2.0 ya Ministry of Electronics and Information Technology (MeitY) kübok sentong balaka lir.

YIC-i sangdong ka nung ashiba agi, GENESIS scheme ya Tire II aser Tire III yimitem nungi startups nem senotsü teyari agütsütsü atema yanglura region aser pei aliba tesem nung timtem balala koktettsü asoshi yimya tasen yangerba nung tashi agütsütsü asoshi lir.

Iba senotsü agütsüba sentong nung jembidang, Nuneseno Chase, Director, YouthNet ajanga shimteta aliba startups nem tenügsang agütsü aser region nung 'innovation landscape' tashi itshidaksüba nung mapa tajung tali inyakba atema pelaba lemsatep.

Iba teyari ya parnoki shisa tasen putitetba atema kisüng masü saka teti asoshi temelenshi tajung bener arutsü parnok dak tashi aliba asoshi lir ta lai ashi.

Senotsü teyari agütsütsü asoshi shimteta startups tem ya URA Agritech Private Limited, Khamlou India Private Limited, BLEND aser AGRI+ alitsü.

URA Agritech Private Limited ya AI amshiba, soil-first irrigation platform ka lir, kobai real-time IoT intelligence amshia tapi agi inyakba mapa melentsür, tsünüsempongtsüü kodang aser kong tzü nungdakdir pa-sasa agütsür.

Khamlou India Private

Limited ya Nagaland digital construction operating system ka lir, koba ajanga osettsüset, mapa inyaker, contractors, equipment rentals sendakteptsür aser tayokdak tesem ka nung timtem majurui tanaben yokteter.

BLEND nükjidong ya ozüing alema gari anena ayuba nungi kumzütsü mechi QR technology amshiba automobiles indang lir, koba ajanga jenjang talang yong ajungben telangzüba idangjisa agütsütsü.

AGRI+ ya TerraLink+ den democratising soil biology südaksütsü, kidang microbial soil test agitettsü, minute pongu tsüngta simple strip ka aser AI-powered mobile scan ajanga 'lab-grade insights' agütsütsü nükjidong nung lir.

Neikepekho Shoshahie, Associate Director, YouthNet ajanga jembidang, iba senotsü teyari agütsüba ya ajanga startups temi yimya tajung, technology amshiba nung yarisemtsü ta ashi.

Iba scheme yagi electronics aser information technology nungi artificial intelligence, Internet of things aser blockchain tashi atema lenmang tajungba lapoktsütsü aser healthcare, education, agriculture aser sustainability nung yaritsü, ta Shoshahie-i ashi.

2025 küm YouthNet-i MeitY GENESIS 1.0 kübok innovators nem sen 20 lakh agüja liasü.

Government of India-i GENESIS scheme kübok küm pongu tsüngta sen 490 crore amshia India nung yimti tilatem nung technology startups 1,600 shi yaritsü nükjidong lir.

Namsang EAC Head Quarter tesem Yonglok-i belenogo



Namsang EAC Head Quarter melenshiba sentong nung Nagaland Chief Minister, Dr. Neiphiu Rio-i jembidang tangokba noksa nung angur.

Dimapur, Aenjeti/January 13 (TYO): Kongshong nung aliba Namsang EAC Head Quarter, Yonglok Area-i belenba sentong ka Yonglok village Community Hall, Longleng nung January 12, 2026 nü agia liasü.

Iba sentong nung tetushi tesemdang Chief Minister, Dr. Neiphiu Rio liasü.

Dr. Rio-i sentong nung jembidang, mapang talangka nungi nüburtemi meshiba ama aser administrative maparen tashi itshidaksütsü nükjidong nung Longleng district kübok Kongshong tesem nungi

Yonglok tesemi Extra Assistant Commissioner Headquarters of Namsang Circle belentsü telemtetba agi, ta ashi.

Rio-i Namsang nung aliba nüburtem dang iba tesem nung terenlok atema shilem tajung agiba atema tenügsang agütsü aser maongka tasen agizüka maneni aintsü, tesendaktep tajung nung yimchiyimjunga alitsü imlaba lemsatepa liasü.

Iba sentong nung Deputy CM, Y Patton, Legislatures B. Bangtick Phom, A. Pongshi Phom aser DC Longleng, W. Manpai Phom nungeria jembia liasü.



MGNREGA Bachao Sangram sentong nung Karnataka Deputy Chief Minister DK Shivakumar aser tanga lenirtem tangokba noksa nung angur.

Indian Army-i Pakistan nem tekümdangtsü metetdaksü

New Delhi, Aenjeti/January

13 (Agencies): India army chief, General Upendra Dwivedi-i Mongolbarnü ashiba agi, Pakistan dang India-i drone tem meyoktsü atema tekümdangtsü metetdaksüogo. Mongolbarnü DGMO (Director General of Military Operations)-level senden amenba mapang iba ken o benoka liasü.

Chief of the Army Staff-i, Pakistan indang military operations tekolakba dang Pakistan nungi India-i drone tem yokba azüoktsü atema shiogo, ta osangbenertem den sensaksemba mapang ashi.

Jammu and Kashmir nung tensa ya kodangang kecha ataloktsüar mejangja saka azüoka lir, ta Army tekolakba

yagi ashi.

Drone tem indang osang tejangjaba agüja General Upendra Dwivedi-i ashiba agi, drone tem ya tila aser light tsükloker aru aser anüngleni talangkabo yima metui liasü. January 10 nü drone trokshi aser January 11 aser 12 nü drone ana asemka yimzua nguogo, ta pai ashi.

"Item ya defensive drone tem liasü asütsü ta amanger, koba asenok anema kecha jenjang agi magi asadangtsü atema yokba asütsü. Kiralongrartem yoktsü atema Indian Army inyaksangshi nung kecha tawa ali mali aji asadangtsü atema yok asütsü südi," ta General Dwivedi-i ashiba agi, parnoki osang tajungbo magizüki alitsü ta

shisem.

"Tanü parnoki kiralongrartem yoktsü atema tawa kecha mali ta nguteter alitsü," ta General Dwivedi-i ashi.

Pakistan nungi yok asütsü ta temulung melemi bilemba drone tem ya Rajasthan kübok Jaisalmer district aser Jammu and Kashmir nung India-Pakistan arrtsülen Deobar aser Hombarnü yimzua nguogo.

Drone ka Hombar aonung Rajasthan kübok Jaisalmer district nung gas-based thermal power plant ka kolak nung yimzua aliba nguogo.

Kasa mapang nung Samba district nunga Hombarnü Pakistan nungi yok asütsü ta temulung melemi bilemba drone kar yimzua lazükba sülen security akangshia liasü.

Delhi CM-i kaketshir 1,709 nem scholarships sen crore 25.25 agütsü

New Delhi, Aenjeti/January

13 (Agencies): Swami Vivekananda asoba anogo den denchitepa Delhi Chief Minister Rekha Gupta-i Hombarnü Delhi Higher and Technical Education Assistance Scheme kübok rongsenketzung nung tangar memenepi aliba kibongtem nungi temaba jenjang nung takok anguba kaketshir 1,709 nem scholarship sen crore 25.25 agütsüogo.

Thyagaraj Stadium nung scholarship lemtsüba sentong nung o jembiba mapang Gupta-i, kaketshirtem nem senotsü teyari agütsüba ya tarutsü atema Delhi sorkar indang investment ka, aser yimti nung aliba lanurtem tashi itshidaksütsü atema jenjang ka agiba lir, ta ashi.

Iba sentong nung Education Minister Ashish Sood, Education Department nungi ketdangsur tejentem, university balala vice chancellor tem, educationist tem aser kaketshirtem aikati shilem agia liasü.

Chief minister-i ashiba agi, 2023-24 aser 2024-25


academic year atema scholarship ya Delhi kübok university balala nung zünga aliba kaketshirtem shirnok temsüa lir parnok indang bank account temi indang indanga yoktsü.

Laisa, taoba sorkari magütsü aliba scholarship sen crore 19 lar sorkari agütsüogo ta ashiba den, kaketshirtem shisaluyim atema lezmüksüba senotsü kecha tarutsü nunga sota mayutsü ta shisem.

Kasa mapang nung National Youth Day amungba anogo Gupta-i kaketshirtem dang Swami Vivekananda tebilemdangba aser pa indang philosophy agi parnok ajungmesodaksütsü aser pei nükjiding tongtetsü atema bendanga agüja inyaksü ajungshia liasü.

Laisa, linük ka renloka aobaji lanurtem koda tejakdangi aoer iba dak keta lir ta shia, 2047 küm tashi nungbo India ya developed linük ka kümdaksütsü asoshi nükjiding aliba nung lanurtem shilem indang metetdaksü.

J&K LG Manoj Sinha-i sorkar tenzüker 5 mapa nungi anentsü



New Delhi, Aenjeti/January

13 (Agencies): Jammu and Kashmir lieutenant governor Manoj Sinha-i Mongolbarnü sorkar tenzüker pongu mapa nungi anentsüogo. Parnok ya kiralongrar telok balala den sendaka aliba atema mapa nungi anentsüogo, ta ketdangsurtemi ashi.

Security agency temi ashiba agi, sorkar tenzükertem ya kiralongrar telok balala den sendaktepa liasü aser national security raksatsütsü atema kümtem tsüngda parnok administration-i ayaoka ai. Parnok ya Constitution Article 311(2)(c) kübok aija mapa nungi anentsüogo.

Mapa nungi anentsürtem rongnung Mohd Ishfaq, tesayur, School Education Department

Tariq Ahmad Shah, Lab Technician, Health Department, Bashir Ahmad Mir, Assistant Lineman, Public Health Engineering Department, Farooq Ahmad Bhat, Field Worker, Forest Department

Mohd Yousf, Driver, Health & Medical Education Department nunger densema lir.

Tesayursang ya Pakistan nung amendaker aliba Lashkar-e-Toiba (LeT) den sendaktepa liasü, shiba Jammu and Kashmir Police-i 2022 küm April ita police amaktsü sentong yanglur aliba benoka minyak tsüngda pua liasü. Laboratory technician aser forest department field worker na ya Hizb-ul-Mujahideen (HM) den sendaka liasü aser assistant lineman sang ya LeT den sendaktepa liasü.

J&K Union territory nung terror ecosystem loksatsütsü atema 2021 küm nungi jenjang agi tenzüker nung shilem ka ama tang iba jenjang ya agiogo, ta ketdangsurtemi metetdaksü. 2021 küm nungi tang tashi nung kiralongrar den sendaka aliba sorkar tenzüker 85 mapa nungi anentsüogo.

Union home minister Amit Shah-i tawa security forces tem dang Jammu and Kashmir nung kiralongrartem indang infrastructure aser parnok nem senotsü teyari agütsüba dak talisa rangloker counter-terror operation tem taliba benoka inyaksü asoshi tetuyuba agütsüba sülen tang iba jenjang ya agiogo.

'Modi-i Tamil nunger ola temsepa metoktsütetsü': Rahul Gandhi

New Delhi, Aenjeti/January

13 (Agencies): Congress lenir Rahul Gandhi-i Mongolbarnü, Centre-i Vijay-i tongti shilem agiba "Jana Nayagan" film nokdangtsü merangba ya Tamil nunger sobaliba anemba ka lir, ta ashiba den Ato Kilonser Narendra Modi-i Tamil nunger ola temsepa metoktsütetsü, ta shisem.

Election agitsü aliba Tamil Nadu state semdangba mapang Gandhi-i iba olen lemsatop, kong actor aliba nungi politician akümsang Vijay indang Tamil film mesayadaksüba atema ken o tulu ka kümer lir.

January 9 nü Madras High

Court-i iba film mesayai atatsü atema tetuyuba agütsüba asadangshitsü atema iba film producer-i Supreme Court nung ken o ka benokogo. Iba film ya yimden yimsüsüba dak sendaka lir.

X nung post ka ajanga Gandhi-i ashiba agi, "I&B Ministry-i 'Jana Nayagan' nokdangtsü merangba ya Tamil sobaliba amakba ka lir."

"Mr. Modi nai Tamil nunger ola kodanga temsepa metoktsütetsü," ta Lok Sabha nung opposition lenir yagi ashi.

Vijay-i tawa pa indang political party, Tamilaga Vettri Kazhagam (TVK) amenokogo. Vijay yimden yimsüsüba nung

bendanga shilem magi tsüngda "Jana Nayagan" film ya pa indang tatembangbuba film asütsü ta jembia aruogo aser January 9 nü Pongal benjung amungba mapang sayatsü liasü.

Ajisüaka film ya sayatsü lia Central Board of Film Certification (CBFC)-i mapang shitak nung temelaba magütsü liasü.

Justice PT Asha-i CBFC dang "Jana Nayagan" atema temelaba agütsütsü tetuyuba agütsüba sülen ghonda ishika lir division bench indang order aru aser iba ajanga film board-i iba ken o ya review committee ka dangi abentsü tuyuba nokdanga liasü.



Kolkata nung US-i Venezuela anema jenjang agiba anema longkak aitba mapang tangokba noksa nung angur.



TIR YIMYIM YIMOBILEM (EDITRIAL)

DIMAPUR WEDNESDAY, JANUARY (AENJETI) 14, 2026

India-i Myanmar yaritsüla

- P Tiamongba Aier

Myanmar nung yaküm December ita tatemlen nungi elections tenzüka agia arudar saka iba ya tenüng atema agir ama repranger. Taoba ita tatemlen nungi tan January ita tatemlen tashi shilem asem lemsar election agitsü saka BBC report ka nung elections ajanga Myanmar nung democracy bener marutsü ta ashir. Iba elections nung political party tongtitem maden, lennirtem tepuokdak yua lir aser civil war ajanga linük nung nütsüng yongsük tesadang den teimbai vote magütsütettsü anungji election agiba ya nüngdak mali ta BBC-isa metetdaksüogo. Myanmar nung mitkartemi pusemba Union Solidarity and Development Party dena political party troki linük ajungalen elections nung shilem agi. Külen political party 51 aser independent candidate temi state mesüra regional level nung tokteper. Ajisüaka, 2015 aser 2020 nung takok tulu anguba Aung San Suu Kyi'er National League for Democracy (NLD) tan elections nung shilem magidaktsür. Iba kija agi danga election ya tim masü ta kuli agütsür. Suu Kyi ya küm trok tashi tepuokdak mesüra house arrest nung yua lir aser la medeni elections agiba ya tiyazü. Suu Kyi anema ken o tem benoka aliba ya la elections nung shilem magidaktsütsü nükjidong nung yangluba lir aser la küm 20 tema temerenshi angutsü atema sentong renema lir. 2020 küm Myanmar junta-i sorkar matsüngdok tashi Suu Kyi-i State Councillor ama inyaka liasü aser tang-a Myanmar nung la ajak dang nüngtugutiba politician lir. La küm 15 tashi house arrest kübok liasü, la kinungbo aser jabasotem den pilar lidaktsü aser lai Myanmar nung democracy bener arutsü merang. Nübertemi itemji mamadok aser lar sensotemi la dang "Ma Suu" ta maneni ajar. Tawa tu United Nations Special Rapporteur for Myanmar Tom Andrews-i election agiba aitsüogo. "Civilian tem dak maneni bomb pokloktsüba, yimtenren lennirtem tepuokdak ayuba aser sorkar anema ola adokbaji ozüng alema inyakba ta züngshiba junta kati ayongba election ya prangpong agi tuiater jilushi aiba ka dang lir" ta Tom Andrews-i shiogo. Ajisüaka, Myanmar junta tanishirtemi item onüktem magizüker aser BBC dang timi aser ochishia voting asütsü ta shiogo. Myanmar junta tanishisang General Min Aung Hliang-i results adokba sülen maneni yimsü süa aotsü tebilemba mali ta ashir. Pa armed forces nung commander-in-chief lir, civil servant ka lir aser pai president inyaknür ta odang mashitsü ta Aung Hliang-i shiogo saka iba nung tamangtsü maka. Myanmar tensa atema India sorkari ola madoker aser iba ajanga parnoki Gen Aung Hliang nem maneni yimsü süa odaktsünüba sayur. Saka alima nung democracy tulutiba ta ajaba linük nung sorkari ola adoktsü tim. Bangladesh nung taküm February ita election agitsü aliba atemabo India sorkari tebilemtsü abenba ola adokba manener, Awami League noktangba aitsür saka Myanmar nung tenüng atema election agiba atemabo ola mali. Centre sorkari yamai dang inyakra South East Asia nung democratic linük jenjang tajung aliba raksatsü. Myanmar junta ajanga Northeast nunger telungpur telok aika azüokteter alitsu akok saka India-i ola madokba ajanga tenüng menük ang bener arur. Myanmar den kidanger tajung ka ama India-i democracy atema noktakba teloktem pusema nungittsüla. Mapang kabo India-i Suu Kyi nem Nehru Prize agütsüogo saka tanübo asenoki lai teyari nüngdakba mapang meyarira democracy nung tera ayangba linük ka indang teinyaktsü tongtiba meinyaker asütsü. Künü anogo Myanmar nung democracy samar aliba meyipa arutsü aser mitkartemi teti dangbo yimsü süa maotsü. Kodang tepela anogotem arudir tangari India ya Myanmar-i nüngdakdang aser la timtemdang yariba linük ka liasü ta reprangtsüsa aser jembitsüsa tanü kidanger tajung ka ama democracy atema noktaktertem pusema akokba tashi yariteptsüla.

OLEMSABANG

Aomongchen Otsü

- Temjenyuba Longkumer

(Iba Yimjangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

Ainer Temeli telok: Oji and Abooo "ami khan du ainer temeli telok lir, aru moi khan laga ama papa khan be Ao manu heh ase hoilibe moi khan telok pora Ao language du tera tera dang koboli pari ase, hoilibe ene understand du kuri ase de. So apuni khan pora mind nakoribi de please. First of all sobaliba du ki ase ami khan ainer temeli group pora tera hoilibe najani etu pora janibo mon jaikene ahishey. We mean we want to learn uuhhmmmm..... meeetettsüba atema aruba lir." Kanga Pelar. Otsüla: Aya Ayah Ayah tesüngmangtsü ya koda! Tebu tanabuba telok yabo asen yimer oda aoerbo masüa na? Item yabo ainlen talang nungi ainer tesa ka aruba amaidang nibo angar ato, olen paika nungji tesüngmangtsüka asen oshibo züngteta ka dang inoksema jembio. Parnoki jempiba yaba nibo kecha mangatetter, iba ya kechi oshi jembir. Ayaya! tanü ya nupang tu nung tzü süloktsü amai dangbo masütsü südito Tebu? Naia angateter asü?

Obula: Nia parnoki jembiba yabo tera dang angatetera saka angatetepa jembitsüsa merangdija tantsü. Süangni naisa maneni parnok den ya akok tashi jembishinüa asüngdangya süangma.

Otsüla: Ainer temeli telok, nenok rongnung ya kin kidong ajak abensa mena kar amai dang repranger, anungji ni kar dang tasüngdangba kar asüngdangdi. Hai! Kongro tajung Narola, nai inoka aliba süpetiji kechi kidong indang?

Narola: "Otsü obu matibi koi ase nah sathi sathini khan, aru asking my clan mekhela right?" Telok :Haoja, enika ase naki.

Narola: Otsü obu etu nah longkumer süpeti lir.

Otsüla: Tenü nai kotasür na longkumtsür sür nung longkumer ta amshir?

Narola: "Oba du longkumer ase koishi etu pora moi be longkumer lir."

Otsüla: Tenü nebuji longkumer sürabangla najibo tetsür ka asü nung longkumtsür ta ashitsüla ato, aji longkumtsür süpeti lir aser tebur sürabangla longkumer ta ashir aser aji shidak saka najibo tetsür asü nung longkumtsür ta tanü nungi amshiang no. Aya! Ainer lima nung meyoktepa alirji, aibenbo tsürabur denji jembitsüa mapang mangutsü, nenok ainer den lipaliyomga aodang pei bendanger tembar teimba, saka ne oshi, ne ayak tamendaktak aser ne indang tera ner tetsü oshi ajak amadoker yamai ainer temeli dener dang lirapangla kenübo naji shibar mejangja kumadoktsü. Ajidang masü tetsüri koma ashitsü, teburi koma ashitsü mejangjai yamaidang lira ayatai. Ner tsüraburtemi kidang atepzüng Aor Aotsür ka ama Aomongchen sotet ka ama oshi oben jangja jangjaa mesayutetba tejangji yamai ner telok aoera masü tsümara masü ta apuzür. Onok taintem den jembishinü timi mesütetter, otsüla obula nungeribo ner ainer oshi mashiji sadem sadema mejembitetter. Ayah! nemjemsetera semshirtem. Nenok tsüraburtem dang tanu nungi asen oshi mejateta jembitsü sayuang ta shiang no! Ainer temeli telok: Hai otsü obu tanu nungibo nenati teach asüba amaji alitsu try asütsü. Onok tsüraburtemi onok den kasasa tangar oshi yagidang jembir aser onok correction masür ta dang liasü. Next time visit nungbo jung junga practice sür alitsüa. Otsü obu nena den junga converse mesütetba atema kangasa sasar. Saka nenati ashiba sayu otem ya kangasa senti lir, onoki ajak angatetter, onok indang parents tai tuluka lir but aji pora ektom try asütsüako no! Aji onoki promise asür. Kangasa pelara.

Talila Teyangluba telok: Onok ya alima ajak anokshia melenshitsüsang, nisung jaksü pangsü tashi melentetsang, meimchir kolok den asayatetba tematiba teyangluba (AI) putu telok lanurtemji lir. Onok asoshi tamakoktsü ta asubaji melika, onoki memetet mesüra mesütettsü ta asübatemji melika, Otsü Obu nena ya tangsa küm sermer pungu tepenjem ka ka ama yanglutettsüsa talila shisatsü aser tashi lir. Tsürabur, adianu, temeimteper süadoker alibatem bener arua külemi azütepa yangluteter. Süra Iba dang nungia ano talila temaba aser sentiba lir asü ta asungdanga, aser shisadanga arua lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Global Peace Parliament mungdang tembangogo



Kottayam, Aenjeti/January 13 (Agencies): World Peace Mission ajanga ayongzükba Global Peace Parliament tenzüksüba mapang, yimjung asoshi mera agiba aser inyakba ya Tsüngrem mapa maneni inyakba lir, ta taoba Supreme Court judge Justice Kurian Joseph-i ashi.

Tesüüba küm 30 tashi World Peace Mission yagi alima tesem ajunga nung yimjung, telungjem aser 'human fraternity' adokdaksütsü nükjidong nung inyaka arur. Parnok mangdang ya tamangba yimsü, sentsü, kin mesüra linük telemsa nung ajemdaker telemsa melidaksüi temeim nung nisung meimchir agizüktsü lir, ta pai ashi.

Tesunep ya maparen kar shisatetba kisüing masü saka pei teinyaktsü mapa lir, ta World Peace Mission tentetsang aser chairman, Dr. Sunny Stephen-i tayongzükba o jembidang ashi.

Nisung kati takum nung dangar nem agütsütettsüba sempet tulutibaji tesunep ya lir, aser tasoba anogo nungi tasünü tashi nisung takum kahji mapa tajung inyakba, temeim akaba aser tesunep alima temaitsü ka ama alitsüla, ta ashi.

Mungdang tenzükba nung tongti tesemdanger Ambassador T.P. Sreenivasan-i jembidang, tesunep aser ochishiba lima ka adokdaksütsüji mapa temela masü, ta ashi.

Mapang süyitema aodang, tebilemtsü zünger mezüngma, tekangshi aser shisabulu khuret agi pei takum aser lokti asünger, nisung tekolok, temulungjang aser tesendaktep nung kongshir. Tesempatep aser tsükchitepba ajanga alima nung meimchir samatsür, ta ashi. Tatok agütsüba aser temeim aliba ajanga dang chichiba tesunep ngutettsü.

Tetsübo agi nisung

meimchir alar kumdaksür, saka tamang aser pei sasa pei dak temulung lemtetba ajanga nüchi kumdaksür. Pei agitsü kisüing bilemba aser tashi amshitsü jangraba ajanga rara adokdaksür, ajisüaka ajemalu aser nübur tenzüksü tanüla agi tesunep adokdaksür, ta ashi.

Tamangba yimsü, caste aser radical divisions ajanga nisung ka nungi ka tepilaba kumdaksür, yimjung ya nisung ajak kibong ka nungi adokba ama agizükba nung lir. Tatem maka taginüba aliba ajanga temenen, mangyangba, mapa tamajung inyakba adokdaksür, saka tongmelang takum aser pei akaba nung tenük sünga aliba ajanga temulung süngjemdaksür, ta Sreenivasan-i ashi.

Mashi-mametetba aser meshidak angatetba ajanga tsükchitep metsü poroker, koba jembishinü aser shisaluyim ajanga melenshitettsü.

Alima nung telemsa tali adoka mejangjaba agi sünger alidang, Peace Parliament nükjidong ya tejangja lir, ta World Peace Mission indang mentor Fr. Bobby Jose Kattikkad-i ashi.

Mangatettep melen tajunglen nungi jembishinü akatsüla, rara melen yimjung aser temeim, mangatettep melen telungjem alitsüla. Tesempatep, mangyangba mesüra bendangba makai sarasadema, meimtepa aser lemsatepa alitsüla, ta pai ashi.

(Maneni tapak 7 nung...)

Nigeria anüdoklen Fulani nisungtemi tamanger 10 tepset

Abuja, Aenjeti/January 13 (Agencies): Nigeria anüdoklen Fulani shiruru metsürtemi Honibar aonung (January 10) aser Deobarnep mesangwajungi yimtsüing pezü nungi tamanger ter tepset.

Lendong agütsürtem yagi Taraba state nung Donga County kübok Iornem, Kyahar, Uhula aser Samgambe yimtsüingtem amak, ta yangji alir Orlaer William-i ashi.

"Fulani telungpur temi Donga Local Government Area nung aliba nüburtem maka ki o jen rongdoktsü. Khristanpur ter tepset, koba ni tejangja meteta lir. Tanep, Deobarnep, ni iba osang yokdang Fulani telungpuri ano anasa Khristanpur yimtsüingtem maktar," ta William-i Christian Daily International-Morning Star News dang ashi.

Parnok ya Donga jila nungi kilometer ti shi pilar lir, ta pai ashi. "Tang tashi security service nungi teyari agüja mali aser Khristanpur Tsüngrem

taochi nung lir," ta William-i ashi. Yangji alir Kpeibee Twin aser Mercy Emmanuel natia lendong atalokba shiogo.

"Taraba state nung kodang nungi tesunep nung alitsü. Oh Tsüngrem, onok aochiang," ta Emmanuel-i Christian Daily International-Morning Star News dang message ka nung ashi.

"Taraba state kübok Donga Local Government Area nung alitsü asoshi nenok sarasadem nüngdaker," ta yangji alir Adegwa Uba-i ashi.

Muslim Fulani nunger ya million aika Nigeria aser Sahel nung timba alir aser parnok kin telemsa noklang aika lir, shirnoki extremist yimya mamshir, saka Fulani kari radical Islamist tesayuba amshir, ta United Kingdom indang All-Party Parliamentary Group for International Freedom or Belief (APPG) ajanga 2020 report ka nung shia liasü.

"Parnoki Boko Haram aser ISWAP yimya mesük amshir aser Khristanpur dak tenük

ANOGO ABEN TSÜNGREM DEN

O Tebendang

Nenoki o tebandang aser nenok o mebandangtsü; aser nenoki taitsü, aser nenok maitsütsü; tai tokang aser nenok dang adoktsü. Luke 6:37.

O bendangba aser tangatetba tsüngda nung tejangja tepila lir. Tsüngremi nisung mulungjang aser parnok tebilembatem metet (A.Shin 16:2). Tsüngremi dang shirnok merenshitsüla shidak obendang agütsütsü akok. Tatem anogo nung asenok ajak o bendangtsü asoshi obendangba menden nung Khrista amentsü (2 Kor. 5:10). Asenok tebilemtsüji asenoki obendangba menden nung mener, shirnoki temenen menaogo ta asenoki bilemer parnok nem obendang agütsüner! Laishibai ashir, asenoki o mebandangtsüla mesüra tangar maitsütsüla kechiaser asenok obendangtsü aser kasa mapang nung mekümzüktettsü. Asenoki kar o bendangtsü aser kasa mapang nung parnok asoshi sarasademtsütsüji tasak. Asenok obendang agütsüba kasa mapang nungji Tsüngrem teküzmükba mapa nung asenok matener akümtsü akok. Laishibai ashir, Tsüngremi kasaji asenok nem ajangzüktsütsü. Tangar dang asenoki koma benshir kasaji asenok dang benshitsü (Luke 6:38).

Tangar o mebandangtsü Tsüngremi asenok nem ozüng agütsür saka asenok nem tangatetba kadaktsüner. Nisungtem tanelaren jenjang, parnok taküm süngjang (mapa) nungi metettsü ta Yisui ashi (Matt. 7:16). Nisungi ayi dong nungi tsükmenatsü maonger ta Yisui ashi. Nisung ka taküm nungi ayi adokra, paji tsükmenatsü tezü masü ta asenoki metettsü. Asenok o Bendangertem asü? Masü, asenok tangatetter lir. Laishibai ashir, Sensamasarji mintokang (A.Shin 22:10; 17:12). Asenoki sensamasar aser tamashirji mejangjara, asenoki Tsüngremer ozüng nung tashi angatsü makok. Sensamasar tamashi jangjabaji obendangba masü, tangatetba lir.

Temenen lenmang nungi kümzüksü asoshi tangar taküm ajia alitsü Laishibai ashir.

Tsüngremi reprangba ama nai reprang nung dang nai tangar yaritettsü.

Nai o bendanga lira Tsüngrem dang tatok meshiang aser tenzüker ka ama Tsüngremi amshitsü ne sasa tenangzükba agiang aser jungtephitsür akümtsü (2 Kor. 5:18).

AO OSHI ANGAZÜKDAK:**TANÜ ANGAZÜKTSÜBA OJANG****Tsüshioshi**

(n) ken o junga meteta jembiteter (well versed)

* Lokti nung tsüshioshi nisung nüngdaker.

Tsüshishi

(v) nü aser süng talangbai yoktsü toktepba (javeline throw)

* Moatsü mapang onok tsüshishi toktepba nung sempet angu.



Tir Yimyim

OLONG PAITEP # 7383

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti
4. Tsük rudenba
6. Temzüng tesashi
8. S _ _ _ i
9. Nisung rongnung telemasa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

- (5)

- (5)

- (5)

- (3)

- (3)

- (4)

- (4)

- (3)

- (3)

- (5)

- (5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

- (9)

- (5)

- (7)

- (5)

- (9)

- (7)

- (5)


- (5)

OLONG PAITEP # 7382 TELANGZÜBA**TIPIEN :**

1. Semtu, 3. Lepko, 5. Bilem, 8. Ulu,
10. Tsünpang, 11. Tesangwa,
13. Aoksa, 15. Putir, 16. Yipru.

LANGTSÜNGLEN :

1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

NAI-A YA METETTER

India nung Pariksha Pe Charcha ajanga Guinness World Record tasen ka yangluogo aser iba ya crore 4 tema registrations asüba atema lir.

Iba osang ya Union Education Minister Dharmendra Pradhan-i metetdaksü aser students Exam Warriors ajak dang Pariksha Pe Charcha 2026 nung shilem tajung agitsü ayongzükogo.

Itanagar nung Likha-i mezüngbuba tetsür mayor inyaker**Itanagar, January 13, 2026**

(Agencies): January 12, 2026 nü Itanagar Municipal Corporation (IMC) nung Mayor inyaksü atema Likha Nari Tadar-i tezüngzüktep agiogo aser la ya mezüngbuba tetsür Mayor lir.

Itanagar nung aliba DK Hall nung Mayor, Deputy Mayor aser ward 20 prong nungi corporators-i tezüngzüktep agiba sentong agia liasü.

Mayor inyaksü atema Ward 16 nungi BJP corporator Likha Nari Tadar shim aser Ward 19 nungi corporator Tok Tabin Camdir-i Deputy Mayor

**Likha Nari Tadar**

inyaksü tezüngzüktep agi.

Tenaprong ya tang mezüng atema corporators inyaker aser 2025 tashi 2030 kümsük küm

pungu inyaksü.

Tena ya Bharatiya Janata Party indang official candidates lir aser December 15, 2025 nü civic body elections nung ward 20 nungi 14 nung BJP-i takok nguteta liasü.

Iba sentong nung Itanagar Municipal Corporation nung corporators 20 prong nem certificates of election agütsü.

"Itanagar ya Arunachal Pradesh atema konang ka aser India nung yimti temerüktiba kümdaktsütsü atema corporators ajak den külemi inyaksü" ta Mayor Likha Nari Tadar-i osangbener dang ashi.

Bogiheel, Silghat, Pandu & Biswanathghat nung lighthouse yanglutsü**Guwahati, January 13, 2026**

(Agencies): Brahmaputra nung Bogiheel, Silghat, Pandu aser Biswanathghat nung lighthouse tasen pezü yanglutsü ta Union Minister for Ports, Shipping and Waterways Sarbananda Sonowal-i metetdaksüogo.

Iba ya Brahmaputra nung National Waterway-2 anasa lir ta pai ashi.

Visakhapatnam nung Indian Lighthouse Festival 3.0 tembangba sentong nung Sonowal-i iba osang

metetdaksü.

India-i tziyim tsütsü wadang inyaka aruba senmang nung lighthouse ya maitsütem rongnung ka lir ta pai ashi.

"Indian Lighthouse Festival 3.0 ya nübortem den sobaliba, putiotsü aser taküm libalirotsü sendaktepba benjung ka lir. Iba benjung nung sobaliba shilemtem, chiyungtsü, teka agi yangluba osettem aser aonung tobur junga sayuba ajak ajanga India tziükümlen alirtem maitsü jangjatsür" ta Sonowal-isa ashi.

Andhra Pradesh kübok Visakhapatnam nung Lighthouse Museum mezüngbuba yanglutsü aser maritime education, maritime education, heritage conservation aser tourism promotion indang centre ka yanglutsü ta Union Minister Sonowal-isa metetdaksü.

Linük ajungalen lighthouses 75 tashi tourism destinations kümdaktsüogo aser sorkari ano lighthouses talila 25 yanglusemstü sentong lir ta paisa ashi.

Tripura & Meghalaya-i SKOCH Award 2025 agizük**Agartala, January 13, 2026**

(Agencies): Tripura nung Urban Development Department kübok Mukhya Mantri Nagar Unnyan Prakalpa (MMNUP) nem SKOCH Award 2025 agütsüogo.

SKOCH Award ya linük nung independent national awards tematiba rongnung ka ta züngshir.

January 10, 2026 nü India Habitat Centre, New Delhi nung SKOCH Summit alidang sempet agütsü ta ketdangsürtemi ashi. Iba sentong ya "Governing Viksit Bharat" omen kübok agiogo.

Urban Development Department nung Director

Megha Jain-i anir tongti ketdangsürtemi state sorkar tenüng nung sempet agizük.

SKOCH group-i kanga junga asadanga bushiba sülen SKOCH Award ya agütsüogo.

Iba sempet ya inclusive growth, transparency, aser good governance nung shilem tajung agiba atema agütsür.

MMNUP kübok Tripura state sorkari urban development projects aika inyakogo. Iba nung city roads & drainage systems tajungba akümba, water supply & sanitation infrastructure modernization, markets & social assets yangluba aser urban service delivery mechanisms tashi itdaktüba

dena lir.

Külen, Meghalaya-ia SKOCH Awards asem ngutetogo aser itemji gold ka aser silver ana lir.

Meghalaya-i Upper Shillong nung Mushroom Development Centre atema Gold Award angu. Shiitake Production and Training Centre nung shilem tajung agiba atema sempet agütsü.

Maneni, Silver Awards ana rongnung kaji Mawlai Community and Rural Development (C&RD) Block nem impactful community-led development initiatives atema agütsü aser kaji Directorate of Tourism-i Nongwar Tourism Project inyakba atema agütsü.



Assam Chief Minister Himanta Biswa Sarma-i Karbi Anglong district nung tetsür ka nem cheque agütsüba angur. Mukhya Mantri Mahila Udyamita Abhiyan (MMUA) kübok Assam sorkari tetsür entrepreneurs 33,811 nem seed money ama Rs 10,000 agütsüogo. Iba ya Entrepreneurship Fund (grant-in-aid) ama agütsür aser Self-Help Groups (SHGs) nungi tetsürtemi micro-enterprises tenzüksü mesüra ulushitsü atema lir.

RSF puri drone amshia southeast Sudan nung nisung 27 tepset

Khartoum, Aenjeti/January 13 (Agencies): Paramilitary Rapid Support Forces (RSF)-i Sinja yimti nung Sudan indang army base ka drone amshia amakba sülen nisung 27 tepsetogo, ta military source kati Al Jazeera dang ashi.

Anogo ka tejakdang sorkar den sendaka aliba Sudanese Armed Forces (SAF) pur küm asem tashi Port Sudan nung amendaker inyaksangshia aruba sülen linük yimtiba Khartoum-i meyipa arutsü ta sangdonger aliba mapang Hombarnü iba base ya maka liasü.

SAF aser RSF na 2023 küm nungi kanga sashia raratepa arudar, aser Khartoum State ya iba telok ana tsüngda mangatettep adokba teyongtsü lir.

Military source, shibai Al Jazeera den jembia liasü, iba source yagi ashiba agi, Hombarnü drone tem yagi sorkar sepai lenirtem dang masü saka parnok meina oa aliba security team aser civilian tema maka liasü.

Iba lendong nung nisung kwi yiru iba indang osang tejangjabo memetet.

Lendong nung nisung 13 yiruba indang osang Al Jazeera-i agizükogo, saka karibo yirurtem iba dang nungi kanga agi timba asütsü ta shiogo. Military aser health source tem nungi osang agiba sülen AFP news agency-i ashiba agi, iba lendong nung nisung 73 yirua liasü.

Sudan indang White Nile state governor Qamar al-Din Fadl al-Mawla ya Sinja amakba

mapang ketdangsürtem rongnung densema liasü, ta sorkar sangdong ka ajanga metetdaksü. Iba lendong nungi pabo jenbogo saka pa den külem tenzüker anabo süogo.

Sennar state yimtiba Sinja ya Khartoum-i aoba tongtibang lenmang ka nung amendaka lir. Iba yimti ya linük yimtiba nungi north len km 300 shi pilar lir.

Iba yimti nungsa SAF indang 17th Infantry Division indang headquarters amenoka lir, koba Hombarnü maka liasü.

RSF adviser Al-Basha Tibiq-i social media sabang Facebook ajanga ashiba agi, Sudan military lenirtem nem tekümdangtsü ka metetdaksütsü atema drone amshia iba tesem maka liasü.

Ajisüaka Sennar state sorkar otongdar Salah Adam Abdullah-i ashiba agi, SAF puri drone tem ya khadanga liasü. "Army indang anti-aircraft defences-i drone tem ya nokdanga liasü," ta Abdullah-i ashi.

Paisa, iba tesem amakba sülen civilian tema süogo aser yiruogo, saka yimti nung tensa junga kümogo aser akhi ama dang inyaksangshi südar, ta shisem.

Sinja yimti ya sorkari aziüoka aliba linük anüdoklen tesemtem rongnung kanga dang tongtibang tesem ka lir, saka Sudanese military-i 2024 küm iba yimti meyipa agiba sülen yimti nung kanga sashiabo meraratepi arudar. Sennar state ya drone amshia tatemsa October ita maka liasü.

Sudan nung civil war tenzüker küm asembuba jungogo aser SAF puri RSF ket

nungi Kordofan aser Darfur tesem meyipa agitsü atema asendenshir jenjang agia arudar.

SAF-i Hokolbarnü ashiba agi, parnoki iba tesem ana nung anüng aser ali ajanga tesem balala amakba mapang RSF pur kanga akoksadaksüogo. Iba mapang RSF züngsemtem tesem kar nungibo mintokogo aser noklang aika tepsetogo.

Deobarnü Sudan Ato Kilonser Kamil Idris-i, sorkar Khartoum yimti-i meyipa aoba sangdonga liasü.

Army-i iba yimti ya May ita meyipa agiba sülen PM-i iba osang ya sangdongogo. May ita RSF ket nungi iba yimti meyipa agiba sülen sorkari aritepa masü saka tanem tanemi iba yimti-i meyipa aotsü asoshi jenjang agiogo.

Civil war tetenzüklen RSF puri linük yimtiba ya atsünga liasü aser iba ajanga army den sendaktepa aliba sorkar ya jena aotsüsa aküm.

Linük yimtiba nungi jena aoba sülen rara mapang Port Sudan ya sorkar yimtiba ama inyaksangshia aruogo.

Telok ana tsüngda kanga sashia raratepba den alima kintemi teyari balala agüja aliba magütsüi akümba sülen Sudan nung nisung million 21 - nütsünyongsük shilem 45 shi - yatzüra agi menepogo aser alima nung humanitarian crises tulutiba ka tenzükdaksüogo, ta United Nations-i metetdaksü.

Rara tenzüker Hokolbarnü anogo 1000 jungogo. Iba rara ajanga nisung million 13.6 pei ki toktsür jenshia odaktsüogo, ta UN-isa metetdaksü.

US-i linükasem nung aliba Muslim Brotherhood nem kiralongrar nüngja agütsü

Washington, Aenjeti/January 13 (Agencies): United States-i Egypt, Lebanon aser Jordan nung aliba Muslim Brotherhood organizations ya kiralongrar telok ta nüngja agütsüogo.

Tir Donald Trump-i par administration dang item telok ya blacklist asütsü maparen tenzükanag ta totuyuba ka agütsür hopta ishika lir iba telemtetba ya Mongulbarnü agi.

"Item nüngja agütsüba ajanga Muslim Brotherhood chapters indang azüdokshi samadaksütsü aser parnok alidak tashi mait kumdaaksütsü asoshi maparen inyak tenzüka sayur," ta Secretary of State Marco Rubio-i sangdong ka nung ashi.

"Item Muslim Brotherhood chapters temi kiralongra yariba nung amshitsü rongsen bendenba soittsü atema United States-i takaba hadir ajak amshitsü."

Iba nüngja agütsüba ajanga parnok telok nem osettsüset teyari agütsütsü ozüng agi memelar. Parnokisa iba telok nung tang aser taoba

züngsemtem US-i aitsü memelar aser parnok revenue aruba soittsü asoshi economic sanctions agütsü.

Egyptian Muslim scholar Hassan al-Banna-i 1928 küm tenzüka Muslim Brotherhood indang kongsang ya Middle East tesem ajunga nung lir aser yangji political parties aser lokti tentet dena lir.

Iba telok aser yangji sendaktepa alirtemi parnok ya yimtenren nung yimjung agi shilem agitsü asoshi lir ta ashir.

Lebanon nung aliba Muslim Brotherhood chapter dang al-Jamaa al-Islamiya ta ajar, aser parnok ya Lebanese Parliament nunga züngsema lir.

Jordan nung par teloki par political arm, Islamic Action Front-i 2024 election mapang House of Representatives nung menden 31 nung takok angu.

Ajisüaka taoba kümAmman-i iba telok ya nokdanga 'sabotage plot' ka nung sendaktepa lir ta tai tongloksü.

Egyptian Muslim Brotherhood-i par linük nung democracy yimya amshia 2012 küm khen tir election agiba nung

takok angu. Saka Tir Mohamed Morsi ya küm ka lir mitkar temi tashiyim amshia atsüngdok aser 2019 küm tepuokdak asü.


Cairo-i Muslim Brotherhood ya outlaw kumtsü aser 2013 küm nungi iba telok indang lenirtem aser züngsemtem pua merenshir, anungji iba telok ya telungi ai aser bendang lima nung jenshia lir.

Congress nung Trump indang tembar aikati küm aika iba telok ya blacklist asütsü jembia aru.

Trump-i Lebanon, Egypt aser Jirdan nung aliba Muslim Brotherhood kongsangtem ya "foreign terrorist organisations" ta nüngja agütsütsü ozüng agütsüba sülen Texas aser Florida nung aliba Republican governors temi US nung Muslim civil rights group tulu aika nung lenirtem apu.

State anaprong nung Council on American-Islamic Relations (CAIR) den Muslim Brotherhood ya kiralongrar telok ta nüngja agüja lir.

Mulungnen O



TASOBA :
20-01-1946

TASÜBA :
11-01-2026

Ozü tsürabur **Asür Rongsenpangi Jamir**, Longkong ajungbena iba lima nungi January 11, 2026 anogo nung pila or, onok kinungertem mulungzürep aser mangyim nung alidang adianu, yimtsür yimer, kiyonger, fellowship, senso telungjem kwi kati nübu, shisatsü, rongsen aser sarasadem agi yaritepogo. Nenok ajak dangi tsüngdong arua meshitet nung iba osang kaket ajanga nenok mapa tajung asoshi ozüi kanga pelarni ta iba mulungen o lemsateper. Teyanglur Tsüngremi nenok ajak maneni moajangma.

Temeim Kinungertem & Semchirtem.

KHRISTAN OSANG : Tapak 5 nungi...

Global Peace Parliament mungdang...

Tamangba yimsü ya nisung meimchir telemsa adoktsü atema masü saka nisung kati ka den lungjemtsü asoshi lir, ta Miao Diocese nungi Bishop George Palliparambil-i ashi.

Sentsü, kin aser oshi ya asenok pilatsü atema masü saka telemsa alidak telungjem adokba nung yaritsü atema lir, ta pai ashi.

Iba sülen Literary Parliament tenzüka kenshi-oshi ajanga yimjung adokdaksütsü lenmangtem nung rangloka liasü. Iba mapang Fr. Bobby Jose, Prof. George Thomas, Shiji Johnson, aser Rekha K nungeri jembia liasü.

Religious Parliament nung Sister Dr. Ardra, Sister Jessie Maria, Bishop George Palliparambil, aser Prof. Kaviyoor Sivaprasad nungeri shilem agi.

Nikongdang Women's Parliament mapang Indian social activist Dayabai ajanga Endosulfan lendong indang jilushi ka agi shilem agia liasü.

Rev. Sister Dr. Jovan Chungappara-i yimjung yanglubu nung tetsür temi shilem agitsüba indang jembi.

Iba sülen Media Parliament nung India nunger film director Blessy den Dr. Bibu Narayanan, Bijoy Cherian, aser Jose David nungeri shilem agia liasü.

Education Parliament nung Prof. Dr. Rubel Raj-i shisaluyim ajanga takum nung sunepa alitsüba lenmangtem indang jembi aser Dr. Kamala K., Abhilash Joseph, Dr. Thomas Abraham, aser Dr. Gigi Koottummel nungeria o jembia liasü.

World Peace Mission ya Dr. Sunny Stephen-i 1995 küm India nung tenzüker aser süki ulushia tamangba yimsü balala tsüngta sensaksemba, kibong asendenshi, charity mission, education mission,

green world mission, medical mission, women wmpowerment, media mission, social justice initiatives, peace gardens, family counseling, peace mediation, Youth for Unity, Peace International Film Festival, campaigns against social evils, digital de-addiction programs, cloth banks, daily food distribution project "Food, Knowledge, and Dignity" amala maparen inyaka arur.

Tangbo iba mission ya linük 54 nung kongsangtem rashia lir.

Tsürabor maliba tanurtem, yimdong nung aliba tanur, shiranger, makamaiter, amitsür, tajemzüka jenjang nung alirtem dang temeim sayua Dr. Sunny Stephen-i ola madoki küm 40 jungnüa nisung meimchir tenzüka arur. Item teyari mapa ya yimjak nung mesangdonger.

Sayuba, motivational classes, ken mejemba, kaket alemba, kensep yanglubu nungi aruba sen ya ano nisung meimchir yariba nung tanaben amshir. Küm aika menüka, atala aser telemsa agi sünger aruaka, Dr. Sunny Stephen-i temulungtetba tulu nung iba mapa inyaka arur.

Iba mungang tembangba sentong nung US Government Senior Executive Rev. Fr. Alexander Kurian nem World Peace Award agüja liasü aser Florida nungi John Titus nem Global Humanitarian Award aser Dayabai nem Women Empowerment Award agütsü.

Sijo Vadakkan (Austin), Rwanda aser Kenya nung inyakba nun, Sister Meloma shiba dang "Mother of the Hungry Poor" ta ajar, Dr. Jayakumar T. K., Fr. Davis Chiramel, Jose Joseph (UAE) aser FOKANA President Sajimon Antony nunger nem World Peace Mission Global Excellence Awards agütsü.

Carrick-i United interim head coach mapa abentsü



Michael Carrick

Aenjeti/January 13, 2026

(Agencies): Michael Carrick-i Manchester United interim head coach mapa abentsü mulunga agizükogo aser taoba England assistant manager Steve Holland assistant coach asütsü.

Jonathan Woodgate, Jonny Evans aser Travis Binnion nung Carrick indang staff nung adentsü.

Taoba United aser England midfielder Carrick-i Hombar aonung tenangzüktepba ka yangluogo aser tenündakba paperwork tem ajak tembanga inyakba sülen official osang sangdongtsü, ta club sangdong ka ajanga metetdaksü.

United-i ita 14 sülen January 5 nü Ruben Amorim mapa nungi anentsü aser Darren Fletcher-i anir club asaya ana

asaya liasü.

Honibarnü Manchester City den Old Trafford nung Premier League derby asayaba mapang Carrick-i anir United pur asayatsü.

Arishi küm 44 tain coach ya 2021 küm Ole Gunnar Solskjaer mapa nungi anentsüba sülen pa lenisüba nung United pur asaya asem asaya liasü.

Kasa mapang nung England team 2018 küm World Cup nung pezübuba nung tembangba aser Euro 2021 aser 2024 küm tanabuba jenjang nung tembangba mapang Holland ya Gareth Southgate kübok inyakba liasü.

Pa Chelsea nunga küm aika inyakogo aser manager balala kübok takok ngua inyakogo.

Arishi küm 55 tain coach ya Japan club Yokohama F

Marinos-i April ita mapa nungi anenja liasü. Pa iba club nung ita pezü dang inyak.

Woodgate ya Middlesbrough nung Carrick kübok inyakogo aser pa Leeds nung United indang director of football Jason Wilcox indang team-mate liasü.

Woodgate 2019 aser 2020 küm Boro nung inyak aser pa 2021 küm mapang tatsüka atema Bournemouth manager liasü.

Taoba United defender Evans-a Old Trafford-i meyipa aotsü. Binnion bo club indang coaching staff nung densema lir.

Carrick aser United ketdangsürtem Brehostibarnü sensaksemogo aser pai team atema pa nukla tajung aliba agi chief executive Omar Berrada aser director of football Wilcox na atsüa arua liasü.

Carrick lenisüba nung United pur 4-2-3-1 system ka asayatsü renema lir.

Coach mapa atema Solskjaer-ia United ketdangsürtem den sensaksemogo. Pa taoba mapang iba club nungi asaya aser coach-a inyakogo.

Ajisüaka Solskjaer melen Carrick nem iba mapang agütsütsü telemtetba agiogo.

Amorim-i club toktsüba sülen Fletcher lenisüba nung United pur Burnley aser Brighton na den asaya aser pa Under-18s setup-i meyipa aotsü.

Alonso-i tangatettep nung Real Madrid toktsüogo



Xabi Alonso

Aenjeti/January 13, 2026

(Agencies): Spanish Super Cup nung Barcelona pur goal 3-2 agi makokba sülen anogo ka lir coach Xabi Alonso-i tangatettep nung Real Madrid toktsüogo, ta club sangdong ka ajanga metetdaksü.

"Xabi Alonso ya Real Madrid fan temi teti meimtsü aser nukshitsü, kechiyong pa Real Madrid legend ka. Real Madrid ya teti pa ki asütsü," ta club sangdong ajanga metetdaksü.

Club-isa, second-team manager aser taoba mapang defender Alvaro Arbeloa-i first

team coach mapa bena atatsü ta shiogo.

Alonso mapa nung aniokba sülen ita tenet sülen Real-i pa toktsüogo. Asaya nung imlaba ama takok tajung mongutetba sülen iba jenjang agiogo.

Alonso ya taoba mapang Real indang midfielder liasü aser Bayer Leverkusen nung pai kanga takok ngua inyakba sülen pa nem May ita küm asem atema contract agüja liasü.

Taoba mapang Spain nung Leverkusen pur Bundesliga takok dangi ani aser iba mapang parnok asaya ka

nung danga tamakok mangu. Kasa küm parnoki German Cup akok aser Europa League-a final tonga asaya. Iba sülen Real-i pa anir arua liasü.

Club nung mapang tatsüka inyakba mapang pa co-captain Federico Valverde aser winger Vinicius Jr densema telung nung asayartem den mangatettep adokba osanga prokshiogo.

Alonso kübok Real puri Club World Cup nung Paris St Germain makok, LaLiga nung Atletico Madrid aser Champions League nung Liverpool aser Manchester City mekoki liasü.

Season tenzükba mapangbo Real pur LaLiga nung Barcelona dang nungi point pongu agi tejakdang liasü, saka parnok tang tanabuba jenjang nung lir aser Barca point pezü agi memenepi lir.

Alonso asaya aliba mapang Real nungi asaya 236 nung asaya aser iba mapang LaLiga title ka, Copa del Rey trophy ana aser CL ka koka liasü.

Pa coaching career ya Real indang academy nung tenzük aser iba sülen Real Sociedad indang reserve team coach aküm aser Leverkusen-i oa liasü.

Indian Open: Lakshya Sen-i Shetty kokogo



Aenjeti/January 13, 2026

(Agencies): India Open tebur kija asaya mezügbuba round nung Mongolbarnü Commonwealth Games gold medallist Lakshya Sen-i külem indang nung asayar Ayush Shetty ayong ayonga kokogo.

Sen-i iba asaya ya 21-12, 21-15 agi akok, aser pa tanabuba round nung Japan nung asayar Kenta Nishimoto den asayatsü.

Lakshya aser Ayush na taoba mapangang anaben asayar liasü aser anabenprongla Sen-i koker liasü asünung iba asaya ya-a pai akoktsü imla liasü.

Asaya nung Sewn-i tetenzük nungi kanga junga asaya aser yakta dang pa 7-1 agi tejakdang aküm. Asaya nung Ayush ya tsüba asayar ama reprangtetogo. Iba asaya ya

Sen-i yakta dang 21-12 agi kokatok.

Tanabuba game nungbo Ayush-ia kanga junga asaya aser break tashi nung tena kanga toktepa asayar point 10-11 liasü.

Saka break sülen Lakshya-i asendenshir kanga tashi ita asaya aser Ayush nem maongka aikabo magütsü asaya 21-15 agi koka liasü.

Iba asayamung ya arena tasen ka nung asayadar, kong taküm küm tatemlen BWF World Championships asayatsü lir. Arena tasen nung asayaba indang jembiba mapang Lakshya-i, "asayatsü asoshi tera tasak liasü. Iba tesem nung tang mezügbuba asayar asünung onoki asayatsü asoshi kanga tasak asütsü ta memetei liasü, saka tanabuba round nungibo tajungba küma aotsü imlar. Hall tulu asünung shuttle tera tanemiba arutsü ta bilem, saka kanga takara liasü," ta ashi.

Lakshya aser Nishimoto na tatemsa taoba küm Kumamoto Masters nung asaya koba Nishimoto-i game asem toktepa asayaba sülen koka liasü. Tenapronglai tang tashi nung asembenben koker lir.

SA20: Faf du Plessis yirur masayatetsüsa kümogo



Aenjeti/January 13, 2026

(Agencies): Joburg Super Kings (JSK) captain Faf du Plessis, January 10 nü MI Cape Town den asayaba mapang temeyong yiruba sülen tang asaya aliba SA20 asayamung nung tanungba asayatem nung masayatetsü. Pa melen Donovan Ferreira JSK captain asütsü, ta club sangdong ka ajanga metetdaksüogo.

Club sangdong ka ajanga, du Plessis teka tachichilen temeyong jemtsüba ligament yiruogo ta ashiba den, pa surgery agitsüsa akümtsü aser iba ajanga pa asayamung tembanga masayatetsüsa kümogo. JSK-isa, taoba mapang South Africa captain den parnok maneni nokdaka aliba social media ajanga metetdaksüogo.

"Onok temeim nü den lir, skipper. Faf du Plessis teka tachichilen temeyong jemtsüba

ligament yirua surgery agitsüsa akümba sülen pa SA20 season nung tanungba asayatem nung masayatetsü," ta team sangdong ka ajanga metetdaksü.

Captain masayatetsüsa akümba ya team asoshi takoksa tulu saka Joburg Super Kings pur taküm iba asayamung nung jenjang kanga junga lir. Parnok tang tashi nung point 17 nguteta SA20 points table nung tasembuba nung lir. Tang tashi nung parnoki asaya tenet nung asembo kokogo.

Parnok lenir aser opening batter maliba mapang asayamung tatembanglen parnok tetsükdaksü aika ajangshitsü akok.

Arishi küm 41buba nung du Plessis-i taküm iba asayamung nung innings pongu nung run 135 yangluogo. Pa indang average ji 27.00 aser strike rate 151.68 lir.

Pai run aika meyanglutetsü akok saka pa ya tajangshiba aika bena aliba asayar kar aser kanga dang tesüngiem lenir ka lir, koba team asoshi kanga dang tongtibang lir.

Tang tashi nungbo JSK puri du Plessis melen asayar ka danga sangdonga mali. Parnok taruba asaya Bodhbarnü Sunrisers Eastern Cape den asayatsü.

BILEMDANGANG

"Na khen dang alitsü, saka nai shidak inyakra, khenji teperi."